



病
脹
玉
衡
書
三

ヤ 9
1076
3





痧脹玉衡書卷之中

徧身腫脹痧

橋李郭志遠右陶著

痧者暑熱時疫惡毒之氣攻於裏則為痰喘為血痧
昏迷沉重不省人事若元氣壯實內不受邪不入於
裏即散其毒於肌膚血肉之表為腫為脹若誤飲熱
湯熱酒便成大害此痧之暗者宜從脈異處辨之

治驗

一翰黃聞兒一婢久生瘡患腹大如臆手足俱腫

延余診之左脉微數右脉或時歇指余思瘡毒入
內作腫作脹其脉必然洪數有力方見脉症相對
乃可治其瘡毒今左脉微數右脉歇指脉症不合
必慢痧爲患也視其腿灣果有痧筋青色刺五針
紫黑毒血流之如注未愈又刺指頭毒血二十針
用寶花散併付桃仁紅花湯入服服後腫脹俱消
如舊

一翰黃聞兄長女手足俱腫將逮於腹延余診之
六脉弦細沉遲知其爲慢痧之變症也云宜先放

其痧緣畏刺不放余辭不用藥恐藥氣稍冷不能
治及於血肉之分也越六日腫脹益甚復延余治
令其僕婦爲主女放痧三十餘針紫黑毒血已出
用寶花散稍冷服之併用散痧解毒消瘀順氣之
劑治之以其痧久綿延難於速效計服二十四劑
方得腫脹俱消安平如舊

一賈峰青徧身腫脹服藥不應延余治之余見心
口將平臍有青筋余曰危哉診脉無根殆不可療
然視其指上腿灣青筋交現刺出毒血甚多彼又

謂痧症不當服藥遂已後至一月餘終成真臟而
歿惜哉

一余隣許姓者有子四歲頭面胸腹手足徧身俱
腫脹紅色頭汗如珠不絕求余診視兩關兩尺皆
洪大滑實兩寸脈厥動搖此傷食之痧感於脾經
故徧身肌肉腫脹及看其痧筋不現刮痧不起此
因誤飲熱湯痧氣內攻壅塞衝心故徧身作腫作
脹惟衝心心臟不受其害故上干頭面化而為汗
出之如珠皆心液也用紫朴湯加大黃丸微冷飲

之脹消汗止而愈

悶痧

痧毒衝心發暈悶地一似中暑中風人不知覺即時
而斃此痧之急者如略有甦醒扶起放痧不愈審脈
服藥施治如發暈不醒扶之不能起必須審脈辨症
的確果係何因先用藥數劑灌醒然後扶起放痧漸
為調治

治驗

一注君美內室六月間發暈昏迷延余診之兩寸

扎而散餘脉如常但重按之時見歇指此暑熱穢
氣觸犯心經之痧也扶之不起先用寶花散薄荷
湯併藿香湯冷服稍醒扶起刺出毒血三針不愈
用沉香阿魏丸薄荷湯微冷飲之漸安後用四物
湯調理而愈

落弓痧

倏忽昏迷不醒或痰喘不已眼目上吊形如小兒落
弓之症此暗痧難識必須審脉辨症的是痧毒看其
身體涼熱唇舌潤燥何如然後治之

治驗

一盛洪烈子九月間發熱口渴昏悶不醒兩目上
翻延余診視六脉微細而伏先用寶花散加砂仁
湯冷下而甦扶起放痧十二針去紫黑毒血用救
苦丹併細辛大黃丸加砂仁湯稍冷下又用防風
散痧湯加金銀花丹參山查荀子而痊

一陳公玉八月間時常身熱口中微渴煎滾茶飲
之倏然沉重昏迷不醒余診之左尺沉細動止不
勻右寸脉浮而扎此腎虛而痧犯之腎水之痧逆

行干母肺金故痰氣壅盛而發暈也用獨活紅花湯入貝母牛膝同煎加童便飲之更進圓紅散而醒然後扶起放痧二日後痧氣清用補中益氣湯六味地黃丸調理而痊

噤口痧

默默不語語亦無聲形如啞子此乃痧氣壅盛熱痰上升阻逆氣管故咽喉閉塞而然治宜先放其痧審其肺腎脾三經之脉為要然後推詳餘經之脉則知病之所本矣

治驗

一吳子瑞一女十一月間忽然痧脹心中煩悶昏沉不語子瑞善放痧稍醒語更終日無聲余診之左關有力右脉沉伏傷氣之痧也此女日為後母所詈故有此變用陳香圓一隻煎湯微冷飲之稍有聲焉未愈次日左脉弦長而動余曰怒氣傷肝痧氣猶阻於肝經之故刺腿灣紫筋三針血流如注又刺項心臂指二十餘針乃用二香散陳皮厚朴湯加延胡索香附微温飲之乃痊

角弓痧

心胸脹極。痧毒內攻。故頭項向上。形如角弓。反張。是臟腑已壞。死症也。不可以治。

撲鵝痧

痰涎壅盛。氣急發喘。喉聲如鋸。痛若喉鵝。但喉鵝之症。喉內腫脹。若痧則有如喉鵝之痛。而無喉鵝之腫。脹又形若急喉風。但喉風之症。痛而不移。若痧則痛無一定。且痧有痧筋。喉鵝無痧筋。此可辨也。

治驗

施襲先痰氣壅盛。吹疔痰藥。益凶暴痛極。余診之。脈多怪異。此三焦命門之痧也。闕臂指筋刺十。一針。腿灣青筋刺三針。出紫黑毒血甚多。不愈。用沉香鬱金散。救苦丹。清茶冷飲之外。吹冰硼散。又用荊芥銀花湯。微冷飲之。三劑而痊。

一周。龍生喉痛之極。痰涎壅盛。延余。余曰。痧也不信。飲熱湯。至夕而愈。

傷風咳嗽痧

痧從時氣所感。因而咳嗽。肺經受傷。不可以傷風治。

之蓋傷風以疏風為主若痧則純乎疏風非其所宜
當刮痧為先宜清喉順氣涼肺散痧為主若專重疏
風縱非緊痧急症亦必咳嗽日甚纏綿不已勞嗽等
症由此而成慎之慎之

治驗

徐茂公傷風咳嗽日晡微寒發熱余診之右寸
脈浮而芤餘脈虛而無力時氣所感肺經之痧也
其弟為之放痧刮痧稍可不服藥至十餘日咳嗽
不止余用射干堯苓湯加前胡山豆根稍冷飲之

漸愈

痘前痧脹

痘本先天因時而發必由外感至如痧者亦時疫之
氣所感作脹作痛而胎元之毒因之俱發凡痘未見
點之前痧脹必心胸煩悶痰涎壅塞甚至昏迷沉重
不省人事此其候也其小兒滑疾之脈類於痧症厥
厥動搖之脈雖若疑似難明然痧有痧筋可辨宜先
刺出毒血而後用藥清理之則痧自退痘自起矣若
痘點既形觸穢痘隱者諸痘科自悉不贅

治驗

一夏子亮幼子五月發熱痰喘氣急四肢戰動兩目無神不省人事口熱如爐面有隱隱紅紫細點延余看痘問其腿灣有紫筋兩條余曰兩目無神四肢戰動痘之候也隱隱微點痘之形也口熱如爐紅紫之色熱之盛也但是痰喘氣急有腿灣紫筋兩條必痘因痧脹而發治宜先放其痧後發其痘則痘自起用針刺出毒血隨用荆芥連翹防風紅花青皮桔梗枳殼山查葛子一劑俟稍冷飲之

其痘即發至十一朝乃痊

痘後痧脹

痘後中氣多虛有感必傷尤宜防護嘗有小兒痘後收靨脫痂安然無事一遇暑熱所侵或穢惡所觸即成痧脹往往有忽然生變人多認為惡痘所致即痘科任事者亦以為然竟不知其痧之為害有如斯也

治驗

一胡丹宸子七歲八月出痘脫痂光潔飲食如常行步如舊迨二十五朝忽然叫喊不已發暈欲死

皆以為惡痘餘毒使然求余治之左右手六部俱微細而伏余思惡痘餘毒兆變脈當沉緊有力今微細而伏若此脈症不合視其痧筋歷歷可指刺出紫黑毒血不愈用荆芥銀花湯合和脾宣化飲稍冷飲之即甦後小腹痛變為痢疾用當歸五錢山查一錢熟大黃五分加童便微溫飲之稍安後獨用當歸山查四劑而痊

一張可久女十五歲痘後三十二朝忽然發暈沉重不能轉側延余診治右脈微細左脈洪大時一

歇指視其指頭黑色青筋歷歷刺出毒血不愈用降香桃花散合枳實大黃湯稍冷飲之不愈用三香丸微溫服而痊後傷食為穢氣所觸腹痛刮痧服稜木湯加明礬二分微冷飲之而安

胎前產後痧

孕婦之痧最易傷胎產後之痧須防惡阻較之平人更甚當急為救療庶於痧毒未攻壞臟腑之時可以施治若屬暗痧發於此時胎前痧脈溷於有孕產後痧脈雜於惡阻又無心腹痛據痧從暗發須當究其

症候察其聲色看有痧筋急宜刺破肌膚痧擁尤重油鹽至若痧毒橫行肆攻臟腑莫可挽回慎毋草草以誤人也

治驗

一趙方亨內室懷娠六月寒熱交作煩悶不安延余時痧在始發脈固未現初不覺其為痧用藥不應忽爾昏沉次日余診左手脈伏面目微黑乃識其痧刺腿灣青筋六針出毒血少愈用桑寄生紅花香附益母草荆芥細辛葡萄子神麴冲砂仁末微

冷服而安後用小柴胡湯退熱又參苓歸地健脾養血乃痊

胎前痧痛論

胎前痧痛毒氣攻胎尚懼胎孕絞動傷胎殞命況痧有毒血攻衝胎孕嬌嫩決難安靜至如安胎用白朮當歸茯苓之類痧所大禁若一候用立時痧脹凶危其痧脹所宜惟是破血破氣之劑又胎孕所忌愚嘗斟酌其間若刮痧放痧不愈必欲活血解毒用金銀花丹參益母草紅花桑寄生消瘀而不損胎元順氣

用香附陳皮紫朴砂仁烏藥行氣而不傷胎氣散痧
用荆芥防風獨活細辛透竅而不動胎孕消食積用
山查葛子神麩麥芽寬中而不伐胎性採擇於中
最為穩當然痧毒勢盛此等之藥難於速效或惟用
二味克伐又恐於胎有害此予所以反復而不敢輕
任也

產後痧痛論

產後用藥必須溫暖痧脹用藥惟重清涼此症屬相
反處治之方毋執產後一於溫暖亦毋執痧脹一於

清涼也愚嘗遇此等症竊以為消瘀破血之藥雖同
其餘有不可通用者是以製就一方為臨症之法散
痧用獨活細辛破血用桃仁紅花順氣用香附烏藥
陳皮解毒用金銀花紫花地丁消食用山查葛子神
麩麥芽如產後利用薑灰肉桂以溫血痧症所大禁
痧症利用荆芥防風以散痧連翹薄荷以清熱產後
所不宜况痧症脹極尤重大黃根實柘榔以通其積
滯而產後之藥更不可不禁恐用此傷產後之氣分
也且產婦服藥宜溫痧症服藥宜冷若痧而用溫脹

者益脹產而用冷痧者益痧故予臨症惟取微溫之氣則既無害產後而亦無助痧禍若痧更凶極微溫之氣難於制治加童便以清熱消痧產後痧症俱得其宜矣

治驗

一顧月溪內室產後三日腹中絞痛脹大如臆惡露不通延余診之余思產婦腹痛當在小腹大腹脹痛亦僅微疼今產婦大腹絞痛異常非產婦本症及按脉洪數有力余曰此產後兼痧脹也當取

痧筋驗之不信漫服產後藥益覺昏迷不醒復求余治勢已危極痧筋不現先取童便一杯飲之少甦閱十指筋刺出紫黑毒血二十一針然後扶起放腿灣痧六針絞痛稍定用獨活紅花湯微溫服之迨痧毒消盡脹痛盡止惡露俱通後調補乃痊一蔣南軒內室產後八日惡露去血過多忽惡寒發熱胸中脹悶垂危延余脉洪大無倫余思惡露不盡猶可今惡露去盡何以驟得此脉因語之曰脉甚凶若兼痧可救南軒善放痧信余言入視痧

筋紫紅色者一條放毒血余復診之不復洪大又刺指臂出紫黑毒血三十餘針用獨活細辛柴胡金銀花丹參益母草牛膝石斛烏藥山查陳皮四劑微溫服之寒熱脹悶俱除後調補而愈一單公廉內室產後六日遍體疼痛寒熱如瘧昏悶異常延余六脈時有歇指關左中指右無名指微帶黑色乃知兼痧之症刺指上紫黑毒血七針臂上毒血一針舌底下紫黑毒血一針昏悶疼痛稍緩用獨活桃仁蘇木香附童便薑黃山查微溫

服一劑疼痛昏悶俱除但寒熱未已用金銀花丹參益母草艾柴胡獨活薑灰牛膝山查溫服四劑寒熱乃瘳調補月餘而健

倒經痧

經行之際適遇痧發經阻逆行或鼻紅或吐紅肚腹腫脹臥牀不能轉側者是也肚腹不痛亦為暗痧若痧毒攻壞臟腑者不治

治驗

一沈弘先內人經期發熱鼻血如注昏迷沉重肚

腹作脹。延余診之。脈伏。余曰：兼痧而經逆者也。弘先善放痧刺腿灣二針。出紫黑毒血。不愈。余用桃仁紅花獨活細辛山查香附青皮加童便飲之。經行調理而愈。

痧熱

頭汗痧在叢語附

痧氣壅盛發為熱症。或熱而不涼。或日晡發熱。或潮熱往來。皆痧毒之氣阻而不通。搏激肌表發而為熱。不識者。認為外感。傳經熱症。發汗溫飲。即慢痧遲緩。勢必痧氣益盛。變出頭汗。發狂種種重症。不知外感

之脈浮數而緊。熱症之脈洪數有力。痧症之脈終有不同。或有可疑。須看痧筋有無辨之。即明。

治驗

一沈懷先夏月日晚發熱五日不涼。諸藥不效。反益昏悶煩躁。余診之。右三部及左關俱微細無力。余見其病氣有餘。脈反若不足。知非真不足。乃痧脈之變者也。先令刮背上痧。又於十指臂灣刺出紫黑毒血三十餘針。不愈。用冷茶送寶花散二服。又以陳皮厚朴湯。主之倍加玄胡索香附煎湯稍

冷服四劑而痊。一邵洪玉內室日晡發熱頭汗如雨延余六脉震動不常故知其痧刺出十指紫黑毒血一針不愈煎紫朴湯稍冷服三劑痧氣已盡用大黃三錢枳實陳皮厚朴各一錢煎湯溫飲下其結糞熱退身涼後朝用補中益氣湯夕用六味地黃丸調理而痊。

一褚元龍夏月潮熱往來已六日矣服他藥熱極不涼發狂讖語延余左脉俱微右脉俱洪大非痧

脉不若是之異也視其乳下青筋一條刺出紫黑毒血不愈用桃仁澤蘭等分煎湯平服神情始定日漸調理半月而痊。

痧煩痧睡

痧氣衝於心胸故心煩或嗜睡此等之痧俱屬慢痧之類輕而且淺人多誤以心煩嗜睡治之日甚一日倘日服熱酒熱湯熱物雖非驟然緊急勢必日漸凶險故併錄之以示戒。

治驗

一王培元適會於其弟宋臣書室云及心煩之甚已非一日將服他藥余診之脈症不合止而不服閱腿灣痠筋刺而放之不藥而痊此等痧甚多姑記一以爲例

一余弟驤武每心煩嗜睡自識其痧便欲刮故不藥而痊此由中氣虛故易感痧患雖輕之至不足具述然亦痧之一症也姑錄之以廣其說

老弱兼痧

先有痰火咳嗽之疾忽爾喘急痰涎喉聲如鋸或頭

汗如油喘而不休心胸煩悶莫可名狀雖云痰火危篤往往有之然亦有兼感時氣或穢氣所觸驟然勢盛者凡治必宜細細察脈按症先清其痧次治其痰然後漸補氣血則標本兼得其理矣

治驗

一汪子建母七旬有餘素犯痰火老弱之症忽痰涎壅盛喘急不休喉聲如鋸延余診視六脈不勻有如雀啄雖老弱痰火之脈嘗有歇指亦不足怪然視其驟然作變病必有異余曰此兼痧症尚可

治也。閱其左腿灣下有青筋二條刺之紫黑血流如注。先用散痧消食豁痰順氣之劑併進牛黃抱龍丸病勢漸安後惟補其氣血乃痊。

一盛君和母五十歲痰火多年忽面赤頭汗遍身俱腫喘急煩悶倍常延余診視余思老年痰火固所宜然何面赤頭汗遍身俱腫之驟也。及按其脉又與症相合不可據以為痧然恐痧之為禍不小若竟以老弱痰火治之終覺疑而不安細視其十指有細紅絲筋歷歷可驗則其痧之為老弱變症

也明矣。先治其痧刺指頭二十餘針去其毒血次用稍冷湯服寶花散面赤頭汗身腫俱除喘急亦漸和緩唯是老弱痰火為終身之疾。

瘡症兼痧

瘡痛者心火血熱所致故火盛而膿腫作痛然膿瘡雖痛必漸漸而極非若兼痧之驟故凡瘡瘍兼痧其腫痛必多可畏處况瘡瘍脉多洪數兼痧脉固不同其筋色又有可驗也。

治驗

一潘子亮女十八歲患瘡已半載忽一日飲酒後
膿瘡大盛或以其酒助血熱且食鷄鵝發毒之味
膿瘡腫痛由斯而極治以涼血活血解毒托裏之
劑更覺昏迷飽悶延余治之脈不洪數而反沉微
余曰脈不對症必痧使然刺出指頭毒血又刺頭
頂心一針神情方始清爽但胸中飽悶用順氣散
痧消毒之味四劑微冷飲之兼外搽合掌丸飽悶
膿瘡俱愈

弱症兼痧

先有勞弱不足之症或吐血時發或微乾嗽兩頰
唇口鮮紅或骨蒸發熱不已一觸犯時氣傳染或穢
惡之氣相犯必兼痧脹或多痰喘或咽喉如鯁或心
腹脹悶煩躁發熱較之平時不足之症益覺沉重此
宜以痧為主治之令痧毒退盡方可治其本症不然
勞弱未見凶危痧禍已在目前矣

治驗

一婦人吐血乾嗽晝涼夜熱已久忽午後發熱異
常脹悶沉重他醫以為怒氣血虛用養血化痰順

氣之劑病勢益盛昏迷痰喘不省人事延余左關
微緩無力右關似緊非緊餘脉應指不勻余思怒
氣填胸左關必須有力平時勞弱脉亦自宜弦數
內有鬱血上中二部亦當見芤何脉不對症若是
看其左腿灣有紫筋數條歷歷可指其為兼痧之
症明矣故昏迷痰喘先刺其痧筋出其毒血倍用
寶花散清茶微冷飲之方得神情清爽不復痰喘
昏迷脹悶沉重之勢但勞弱由於本原不足綿延
未愈

痧變勞瘵

痧症有惡飲熱湯者有反喜飲熱湯者惟其喜飲熱
湯痧症益莫能識慢痧所以變成勞瘵也原其痧毒
之始入於氣分令人喘嗽吐痰發熱聲啞蓋火毒傷
肺肺為嬌臟若不知治變成百日緊勞輕者數年難
愈卒至危凶痧毒之始入於血分重者地變在即輕
者歲月延捱若乃毒瘵胃口必須去盡而愈毒瘵肝
經損壞內潰吐血數發勢極多危毒瘵心胞絡更加
凶險不待時日毒瘵腎經腰脊疼痛嗽痰咯血日甚

一日不可得痊。凡痧毒遺患，總成勞瘵。治須識之於始。凡臟腑之病，莫咎其終。若一潰損臟，俱可療治。臟便屬不治。

治驗

一王君瑞內室咳嗽吐痰發熱左背疼痛已年餘矣。延余診之六脈浮緊洪數脈症不合又無痧筋。但用刮痧痛減服散痧清熱消痰順氣四劑而愈。一楊音節痧脹不服藥惟放痧三次胃腕間成大塊咳嗽吐痰發熱不食日漸尪瘦延余診之右關脈芤而緊餘脈俱數余曰內有瘀血必吐出而

可解用桃仁蘇木澤蘭白蒺藜香附烏藥酒煎服之吐紫黑血碗許更用活血引下之劑加童便酒服之而愈。

一左元峰痧脹放痧三次不服藥痧根不絕變成勞瘵咳嗽咯血音啞發喘骨瘦如柴脈洪大無倫余辭不治又二月而終。

噎脹兼痧

先有噎脹而痧氣乘之噎脹益甚在噎脹不可先醫在痧氣自宜早治。

治驗

一江雲甫肚腹脹急如臑臑突筋青心口將平余診之知為血臑之症其指頭黑色此臑症之所無也視指上有青筋兼痧無疑刺二十餘針又刺臂灣腿灣青筋五針俱去其毒血略鬆用蒺藜散微溫飲之臑下青筋漸退後用臑症之藥導去惡水日服治臑香圓丸一月餘臑症盡平永不復發

痧變臑脹

痧者毒也慢痧之毒遷延時日留滯肌膚腸胃血肉

之中若不早治即成真臑

治驗

一嚴天玉次子氣急作脹胸腹飽悶臑下有青筋突起心口將平此慢痧成臑也刺腿灣青筋六針出紫黑毒血甚多又刺指頭出毒血二十四針臑上青筋即淡色腹內覺鬆用寶花散微冷服腹脹漸消其後不復用藥施治但恐其根未除日後復發姑誌之以例其餘
半身不遂痧

心主血。痧毒入於血分，故易攻心。此痧症所以發昏也。若痧之慢者，衝激遲緩，未逆於心，留滯經絡，或在於右，或在於左，為半身疼痛，或麻痺不仁。如此半身遂總因痧毒之遺害也。治之者，見有痧筋，急宜刺破，然後用藥以散其毒，活血以消其瘀，則痧根既拔，其症漸痊。若不知治，綿延日久，痧毒益深，勢不可遏，當又有變症難愈矣。

治驗

一章道庵屢患吐血發熱不涼，左半身疼痛不已。

行步艱難，延余診視。初不覺其為痧也。細思脈症不合之處，檢其痧筋，刺之用桃仁、澤蘭、獨活、烏藥煎一劑，微溫服，吐血疼痛俱愈，永不復發。

一盛成年朝涼夜熱氣急，半年服藥不應，反加右半身疼痛，不能俛仰，咳嗽吐痰，飲食減少，成勞弱不足之症。棹舟迎余，脈不見弦數，而微細，時有歇指脈症，不合閱其痧筋，刺二十餘針，用姜黃、旋覆花、丹參、橘紅、赤芍、玄胡、索澤、蘭山、查角、刺穿山甲二劑，微溫服，疼痛吐痰俱除。後朝用六味地黃丸。

夕用補中益氣湯朝涼夜熱俱愈

內傷兼痧

人有內傷詎無外感外感之症不獨風寒即夏日暑熱之氣時疫傳染之氣穢惡觸犯之氣一受於身亦如外感然則內傷者本病外感者標病故傷寒集中有內傷外感之症此之集中有內傷兼痧之症治法主意先辨痧症治其標後審內傷治其本

治驗

一曹洪字子之外戚爭奪家產涉訟公庭有老婦

造其家互相爭毆發熱沉重咳嗽吐痰胸中脹悶諸親戚惟恐斃於曹姓室中延醫青來王兄更邀余往視青來幾不敢任余憐憫此婦不治人命重情彼此俱敗若一救之不特活婦一命亦且保全兩家是亦大德余為診之知其內傷兼痧症也刺痧筋二十餘針付寶花散微溫服之脹悶稍鬆爰定一方即於青來箱中取藥用桃仁赤芍澤蘭玄胡索紅花陳皮烏藥獨活治其內傷服後下黑糞瘀血俱消諸症俱愈但其舊有不足之症非參不

可後青來用參芪大補乃健而歸

紫疱痧

痧症不內攻則外潰余於發蒙論中已略陳其概矣無如痧症變異更有難盡述者即若為腫為毒之外又有發為紫血疱者此真痧之異者也余故記之以例其餘

治驗

一余隣許秀芝女嫁為養媳婦手足下半身俱腫大腹亦脹發出兩腿足紫血疱如圓眼大密難數

記皆云此爛瘋之症服藥益甚秀芝憐惜其女載與俱歸求余治視疱多可畏及見有痧筋發現於腿灣方知痧者猶樹之根疱者猶樹之葉也遂為放痧三針又刺指頭痧二十一針盡去其毒血復診其脈六部俱和殆其痧毒之氣已散但存肌表紫疱而已用蘇木紅花澤蘭桃仁身藥桔梗梗川芎牛膝一劑溫服凡紫血疱盡收靨結痧而愈

痰喘氣急痧

先有痰喘氣急而痧脹因之先治其痧後治其痰氣

無令痧爲本病之助。先有痧脹而痰喘氣急。因之但治其痧而痰喘氣急自愈。若痧有寒熱不清。痰喘氣急者。兼和解。痧有熱無寒。痰喘氣急者。兼清熱。痧有食結不化。痰喘氣急者。兼消食。順氣。痧有大便不通。小便不利。痰喘氣急者。急攻其裏。痧有痢下膿血。或赤或白。痰喘氣急者。急攻其積。痧有瘀血凝滯。小便利。大便黑。痰喘氣急者。急消其瘀。痧有嘔吐紫黑血。或鮮血。痰喘氣急者。當慮痧毒攻壞臟腑。不痛者。可治。痛而不已者。難治。服藥不應者。死。

治驗

一祖南軒四月發熱頭痛脹悶昏迷痰喘氣急延余六脉無根。余曰脉法六脉無根者。死若爲痧脹而然。則有救。其家善放痧。因悶痧筋放之。不愈。余用沉香鬱金散。圓紅散。稍冷服。又用化毒丹一服。昏迷卽醒。脹悶痰喘氣急俱平。更用防風散痧湯。加青皮連翹山查。蘆子熟大黃一錢。服之。發熱頭痛俱已。六脉如舊。

一費道元內室痰喘氣急。脹悶不已。延余左三部

脉浮緊而數右三部脉如無余曰癩脹暗發也其
兄善放痧刺乳下出紫黑毒血一針如注六脉復
舊余用和脾宣化飲一服稍冷飲之痰喘氣急脹
悶俱痊

一錢公肅子二月晚間痰喘氣急發熱身重腹中
絞痛延余脉沉微刮痧放痧不愈用藿香湯稍冷
服之又用稜木湯加大黃五分微温服之諸病俱
痊

癩瘋

瘋者天地間厲氣所感發而為瘋蓋惡毒之氣躔於
血肉散於肌表留於經絡以成瘋症最惡候也若癩
者亦時行惡毒之氣變為大瘋尚何疑乎余昔在秦
溪嘗見一人犯大麻瘋症眉髮俱脫面目頽敗手足
蹠攣遇一老者為之放痧三次曰此痧瘋也傳汝一
方金銀花六錢黃芩一錢五分皂角刺一錢赤芍二
錢紅花二錢牛膝三錢苦參四錢生地二錢水煎日
服日漸而痊若余於此症固未嘗治及不敢虛載治
驗適余經見老者所治有然故附錄之以見癩症之

亦有是變焉

痧重

痧症始發勢雖凶暴未必身重若飲熱湯熱酒痧毒即阻塞於經絡血肉之間徧身重痛不能轉側放痧之後治宜消痰解毒為先初起易治久則難治放痧服藥不效者死

治驗

一邵光先十一月腹中微痛嘔噦酸水以為胸中受寒服薑湯一碗徧身大痛腹脹身重不能轉側

迎余右脉俱伏放痧用當歸枳殼湯稍冷飲之又用桃仁紅花湯微溫服次日痧毒之氣漸減又放痧服如前藥而愈

一莫東雲次子頭痛發熱胸中脹悶飲熱湯一碗徧身疼痛不能轉側臥床不起服他藥益昏沉延余右寸氣口脉虛左寸微細關洪緊有力知其痧也刺指頭出毒血九針少愈用消痰活血解毒藥三劑而痊

眼目痧

痧者火毒也。若犯痧症，適與心主之火相合，故痧毒逆衝。最要防攻心之患。今少陰心君不受邪，逆犯厥陰肝母，故兩目紅腫如桃。甚則眼珠突出，最為凶險。然他症患目，惟在於目。若因痧為患，必然先覺心中煩悶，而目疾因之。苟不知蚤治，則痧毒已叅陽位，其火勢之炎熱，輕則壞目，重則殞命。治宜先刺巔頂百會穴，以洩毒氣。當放者，放刮者，刮用清火活血順氣之劑，加牛膝、石斛以引火歸原，誠為良法。

治驗

一江道誠患心中煩熱，頭眩，忽兩目紅腫大痛，飲熱茶熱酒，眼珠掛出左目，尤甚。至晚即昏沉發暈，延余診視，左脉微細，無根。痧毒之為害也。放痧不愈，用金銀花、茜草、連翹、黑山梔、枳殼、丹皮、赤芍、牛膝、石斛、草決明、加童便微冷飲之，眼珠始收，調理而愈。

瘟痧

寒氣鬱伏於肌膚，血肉之間，至春而發，變為瘟症。是名瘟痧。又暑熱傷感，凝滯於肌膚，血肉之中，至秋而

發亦名瘟痧。但春瘟痧毒受病者少，不相傳染。時或有之。秋瘟痧毒受病者多，老幼相傳，甚至一家數人犯痧。或一方數人犯痧，其發也必惡寒發熱，或腹痛或不腹痛，似瘧非瘧，或氣急發喘，頭面腫脹，胸腹飽悶，或變下痢膿血，輕者牽連歲月，重者危急。一時治宜放痧消食積為主。俟痧毒已洩，然後和解清理，除其寒熱，健脾胃，養血補其中虛。

治驗

一 洪公震九月惡寒發熱吐痰咳嗽胸中煩悶口

渴舌胎延余診之。左脉時有歇指，右脉沉而有力。刺痧筋，毒血不流，後臥床不醒，益覺沉重。此誤飲熱湯為害也。用陰陽水一碗，加明礬二分，飲之。又用消食去積之藥，加熟大黃一錢，微冷飲之。少愈。次日痧筋復現，刺臂灣一針，十指二十二針，去毒血，用活血解毒藥。諸症漸鬆，調理而痊。

一 公震內室同時惡寒發熱，頭面腫脹，心胸煩悶，似大頭瘟診之。六脉俱伏，此瘟痧也。放痧不愈，先飲微冷礬湯，次用透竅消毒下氣之劑，加牛膝三

錢同煎微冷飲之二服全愈

一公震次子十月寒熱如瘧心腹絞痛吐瀉不已六脉沉緊亦瘟痧為害也用沉香阿魏丸清茶微冷下併和脾宣化飲入大黃一錢同煎微冷飲之次日再服如前而愈

頭眩偏痛痧

痧氣慢者上升於三陽頭面常覺頭眩內熱或半邊頭痛心煩不安宜刮痧不愈用清涼之劑治之

治驗

一鍾仲宣數數頭眩日漸益甚或時右偏頭痛脉症不合刮痧不藥而痊

一潘尚峰苦頭眩或左偏頭痛服他藥不應延余脉微與症不合放痧不愈用清熱下氣之劑而痊

流火流痰痧

痧毒傳變不待時日朝發於足而足腫痛夕流於手而手腫痛朝發於肌膚而肌膚紅腫夕入於裏而痰喘不休此等之痧乍隱乍現乍來乍去按之脉而痧脉或不現最難識認如痧毒所流及之處熱者似流

火而非流火腫者似流痰而非流痰或痛極難忍或
痒痛不已又痧之變者也欲知此痧須看病勢凶暴
不比流痰流火之輕緩者驗之於痧筋發現刺之無
疑然後憑脈所犯風寒暑濕及食積痰血氣阻分治
之斯能有效如或不覺便成痧症

治驗

一張宏原內室日間左足小腿紅腫大痛暮即腹
痛而足痛止次日左足小腿又復紅腫大痛而腹
痛又止來去不常痛無一定延余診之六脈如常

而微數此平人之脈也難據爲痧但症異凶暴須
看痧筋發現便有實據可從痧而理也扶看腿灣
有青筋三條刺之紫黑毒血流出甚多反加痰喘
此放痧有未盡故也用荊芥金銀花湯加土貝母
二錢微冷服二劑少愈次日左足腿灣下又現痧
筋一條刺去毒血併刺巔頂一針服前湯加牛膝
三錢二劑痧退服紅花湯半月腫痛俱痊
一葛隆生次子清晨臂上紅腫大痛次日變爲足
腿上紅腫大痛乍來乍去隆生以爲流火使然延

余診其脈厥厥動搖數而又疾余曰脈異於常而
症多變殆其痧與不信服熱湯二日而殂

一奚敬峰晚間右大腿紅腫痛方已喉旁發腫而
痛延余脈不見異初不覺其為痧也只見時症犯
此者多細看兩臂痧筋刺出毒血如注診氣口脈
洪實用紫朴湯倍山查葛子加大黃一錢微冷飲
之食消便下而安

咳嗽嘔噦痧

痧毒之氣上凌肺金故氣逆發嗆而咳嗽痰涎上湧

或嘔噦惡心或面目浮腫或心胸煩悶此熱毒入於
氣分痧筋往往不現治以刮痧為主間有人入於血分
者必有痧筋然後刺之臨症用藥宜理痧毒為主若
以傷風咳嗽治之則悞矣

治驗

一俞仲嘉長女五月發熱咳嗽嘔吐痰涎胸中脹
悶面目浮腫延他醫服傷風痰嗽之藥四劑心中
益脹悶遂止不藥將及一月余偶過求余診之右
寸脈虛知其為痧之變症也刮痧訖用防風散痧

湯加貝母薄荷童便微冷飲之即痊

一王惟誠咳嗽發噎不絕聲面目俱腫嘔痰不已
更吐鮮血延余治之六脉弦緊且數此痧毒之氣
搏激於筋脉間故見脉乃爾刺指頭出毒血三針
令多為刮痧用寶花散加童便微冷服又用圓紅
散微温服而痊

痧脹玉衡書 卷中

